



ATASSUT
Steen Lynge

UPA 2016/109
26. 04. 2016

Siunnersuut uunga: Isumaginnittoqarfiup aqunneqarnera aqqissuussaanelu pillugit Inatsisartut peqqussutaata allanngortinneqarneranik Inatsisartut inatsisaat nr. xx.xx 2016.
(Ilaqtariinnermut, Naligiissitaanermut Isumaginninnermullu Naalakkersuisoq)

Aallarniutigalugu ATASSUT-miit Ilaqtariinnermut, Naligiissitaanermut Isumaginninnermullu Naalakkersuisoq qutsavigissavarput taama soqutiginarfigisumik pisarialimmillu siunnersuummik saqqummiussaqaqarneranut.

Taamatut oqaaseqaatitta aallartippallaannginnerani ATASSUT-mit oqaatigissavarput ajuusaarutigatsigu siunnersuummut Ilanngussaq 1 - Tusarniaanermut akissuteqaatinut allakkiap kalaallisuaa amigartumik nassiunneqarsimammat, siunnersuutilli ataatsimut isummersorfiginissaanut akimmiffiginagu maanna oqaaseqarfigissagatsigu.

ATASSUT-mit tupaallaatigivallaanngilarput, tusarniaanermut atatillugu isorinnittoqarluni pimmat imaluunniit kommunit nammineersinnaatitaanerannik killilersuisoqarnissaanik ernumasoqarluni pimmat imaluunniit kommunit nammineersinnaassusiata inatsisit tunngaviusutigut illersugaanerat.

Naalakkersuisulli naliliinerat naapersortulugu, siunnersuut aammalu arlaatigut inunnik isumaginninnermi ingerlatsinermik atorunnaarsitsilluni aalajangiinerit kommunit nammineersinnaassusaannik innarliinavianngitsoq, tamannalu ATASSUT-mit upperaarput.

Sinerissami siorna ilaatigut MIO-mit peqataaffigineqartumik angalasoqarneratigut, tusagassiutini saqqummerpoq, erseqqaarissumik takussutissaqarsimasoq, sumiiffinni amerlasuuni ilaqtariinni naviatorsiorfiusuni meeqqanut inuusuttunullu iliuusissatut pilersaarsiortoqartarsimannginneranik. ATASSUT-mit isumaqarpugut tamanna inuiaqatigiittut tamat oqartussaanelanik pingaartitsisutut

aammalu akisussaassusilittut ingerlatsinermik takussutissiinngitsoq, qangami Nunatsinni Inatsisartuusimasut Naalagaaffiit Peqatigiit Meeqqat pillugit Isumaqatigiissutaannut 1992 akuersaarsimavoq, taamaasillunilu danskit nangaassutaat 1991-meersoq maj 1993-miit atorunnaarsinneqarsimalluni.

Taamaattumik ATASSUT-mit isumaqarpugut, Naalakkersuisut taamatut siunnersuuteqarnermigut periarfissaqartitsilissapput pisussaaffitsinnik naammassinnissinnaanngornissatsinnut, pingaartumik meeqqat navianartorsiortut pillugit nalunaarutiginneqartarsimani pillugit aammalu ikiorsiiffiqarneqarsimalluni.

Taamaattumik ATASSUT-mit isumaqarpugut, taamatut Inatsisartut peqqussutaannik allannguiniarneq, meeqqat navianartorsiortumi inissisimasut soqutigisaannik iliuuseqarnerusoq, ungasinnerusoq eqqarsaatigalugu, meeqqat persuttaanermik, atonerluinermik sumiginnagaasimanermik nalaataqarsimanerannik nalunaarutigineqarsimasut kommunit ingerlatsiviisa iliuuseqarfiginngitsoorsinnaassanngimmatsigit.

ATASSUT-mit kommunit namminneq oqartussaaffeqarlutit pisinnaatitaaffeqarneri ataqquisorujussuuvagut, aamma isumaqanngilagut Naalakkersuisut siunnersuutaata kommunit nammineersinnaassusaannik innarliinerusoq, ATASSUT-miilli isumaqarpugut meeqqanut sumiginnakkanut assammik isaassinerusoq, meeqqanut nunatta siunissaannut, meeqqat tunngaviummik pisinnaatitaaffillit, meeqqat ineriartornissaminnut pisinnaatitaaffillit, meeqqat illersorneqarnissaminnut pisinnaatitaaffilli aammalu aalajangeeqataasinnaanerminnut pisinnaatitaaffillit.

ATASSUT-mit aamma neriutigaarput, taamatut allannguuteqarneq kommunenit tiguneqarluaannarnani aamma Qitiusumik Siunnersuisarfik aamma atorluartarumaaraat, taassumami siunertarimmagu meeqqat inuusuttullu navianartorsiortut pillugit kommunini ingerlatsiviit siunnersorlugillu ilitsersortussaammattigit, tassungalu siunnersuisarfimmut ukioq manna aningaasanut inatsisitigut 19 mio. kr.-nik immikkoortitsiffiqarneqarnikuvoq.

ATASSUT-mit pingaartillugu siunnersuutip siullermeerneqarnerani oqaatigerusupparput, qanorluunniit ingerlatsinermik atorunnaarsitsineq pingaluarpat, innuttaasut

periarfissariinnaavissammassuk Isumaginninnermi Naammagittaalliuuteqartarfimmut aalajangiunneqarsimasut suli maalaarutigineqarsinnaanissaat, qanorluunniit aalajangiineq kommunimiit imaluunniit Ilaqutariinnermut, Naligiisitaanermut Isumaginninnermullu Pisortaqarfimmiit pisimangaluarpat.

Taamatut siunnersuummut oqallisigineqartumut oqaaseqaateqarluta ATASSUT-mit tamakkiisumik tapersiinerput oqaatigissavarput aammalu partiit tamaasa kaammattussavagut siunnersuut taperseqqullugu. Taamaasilluta siunnersuutip akuersissutigineqarnissaa innersuussutigivarput, akornutissaqartinngilarpullu Inatsisartut ataatsimiititaliaannut susassaqtunut suliap ingerlateqqinneqarnissaa.

Qujanaq!